



G W E R Z

SANTEZ GERMANA COUSIN

WAR DON : *Santez Mari.*

1. Pegen mad oc'h, ma Doue ! bars ann env e welomp
Eur zantez e deuz bevet war ar mez evel-d-omp !

DISKAN :

O Germana, hon feden
Gan-hec'h ra vo deut mad !
Gant fians ni hen goulen,
Rak c'houi anav hon stad.

2. Paour vel ar mabik Jezuz, enn eur gerik dister,
Germana a oe ganet, e ti eul labourer.

3. Dal m'e doa nerz da gerzat, d'ar park e oe kaset,
Henvel ouz hon bugale da viroud ann denvet.
4. Amzer d'amzer e pede, stouet war he daoulin,
Hag e tenne adarre war he c'higellik lin.
5. He feden hag he labour, 'vel c'houez-vad ar bleuniou,
A greiz al lann a bigne, hed ann de, d'ann envou.
6. Ha pa helle d'ann iliz, a red-kaer ha treid noaz,
Dirag Jezuz ha Mari ec'h e da bedi c'hoaz.
7. He c'higel plantet er park, a re aoun d'ar bleizi,
Hag ann denvet a chome bodet endro dezhi.
8. D'ann noz, gand eul lez-vamm gri, n'e doa nemet gourdrouz,
Bara zec'h evit he c'hoan, da wele eunn tamm plouz.
9. Tud a skiant ho dije goapeet ar plac'hik kez,
Gant he brec'hik mac'hagnet hag he zempladurez.
10. Daoust ma oa goann ha dister ouz daoulagad ann dud,
Ar zantez dalek neuze a reaz meur a vuzud.
11. Eur wech e kase bara d'eur paour, amzer ar skorn,
Ar vamm-gaer a red warlerc'h, gand eur vaz enn he dorn :
12. Gorteit, laerez, emezhi, gwelomp hoc'h aluzen :
Germana bepred zentuz, a zigor he barlen.
13. Elec'h tammigou kreun zec'h e kouez euz he daonjer
Bleuniou-roz euz ar c'houeka, bleun ann nevez-amzer.
14. Eur waz war hent ann iliz a ruil, traou ar zaonen,
Er goan pa'z euz dic'hlagh dour nikun na hell tremen :
15. Mez dindan treid ar plac'hig ann dour a galed ;
Mont dont hep beza glebet er waz e tremene.
16. Hep gouzout skriva na lenn pad ma vije da vez,
E komze kaer a Jezuz, hag he vamm ar Werc'hez.
17. He c'herent a oa kousket pa varvaz Germana ;
Den enn he zi na glevaz he c'huanad diveza.
18. Mez enn er da c'hanter-noz oe gwelet o tiskenn,
Da ziarbenn hec'h ene, kalz a Werc'hezet wenn.

19. Pa oe digoret he bez, goude daou-ugent vloaz,
He c'horf a oe bet kavet ken iac'h evel biskoaz.
20. Eur gurunen war he zâl fresk-bev a oa chomet
Vel pa oe laket dezhi gand he mignonezet.
21. Ann oll a veule Doue, o welet kement-man,
Nemert eunn itron iaouank, mamm 'vit ar wech kentan.
22. Kenkent he mab n'he gavel, kaer e deuz war he dro,
A ia war zemplat bemde, tostet ra he varo :
23. He c'halon trubuillet braz e c'houlenn trugare,
Hag e woestl ar bugel kez d'ar zantezik neve :
24. Ann noz-ze pa ma c'hirvoud ann itron hep kousket,
Eur sklerijen enn he c'hampr raktal e deuz paret :
25. Er sklerijen Germana a zel enn eur c'hoarzi
Ouz ar bugel, ouz ar vamm, laret a ra dezhi :
26. « Skoet oc'h bet gant Doue : na oelet ket pelloc'h ;
Doue en deuz bet truez ouz ho mab hag ouzoc'h. »
27. Mintin-mad ann de warlerc'h ann itron, war he zroad,
He bugel iac'h war he brec'h, ie da drugarekad.
28. Epad daou-c'hant vloaz goude Pibrak e deuz gwelet
O tiredek a bep tu tud klanv o klask iec'het.
29. Pibrak epad daou-c'hant vloaz e deuz gwelet dalc'h mad
Goude daelou ar beden re'nn anoudegez-vad.
30. Ar pab e Rom a glevaz komz euz a Germana,
Hag e oe laket prestik e touez ar zent gantha.
31. A nevez-zo Breiz-Izel e deuz bet ann enor
Da zigemer enn he c'hreiz eunn hevelep tensor.
32. E Breiz evel enn he bro ouz ann dud ema mât :
Bez e deuz grasou da skuil war bep oad ha peb stad.
33. Ar bugel brema zantez a gar mui koulskoude
Ar vugale da gentan, ann dud iaouank goude.
34. Didosteit, mammou kristen, euz oter ar ROZER,
Enn iliz Pluguervez ar zantez a gaver.

35. Endro dezhi war ar mein, enn aour emma skrivet
Darn euz ar madelezeou e deuz bet 'n'hon andret.
36. Mez na vo skrivet biken nemert gant dorn Doue
Pegement e plij dezhi ober vad d'ann ene.
37. Enn envou gand ann elez e ren kreiz ann dudi,
• War ann douar, Bretonet, kanomp he meuleudi !
38. O zantez ker, benniget hon bugaligou baour :
Ho pennoz a dalo d'he ouzpenn arc'hant hag aour.
39. Dalc'het enn ho c'halonou fe grenv ho zadou koz,
Rak ni fell d'imp ho c'havet ganimp er Baradoz !
40. Pelleit ouz ann dud iaouank, ar pec'het, ar skuer-fall :
Biskoaz Satan 'vit ho c'holl na stourmaz kement-all.
41. Digaset zonz d'ar gerent ho deuz, abeurz Doue,
Eur garg euz ar boneran kenver ho bugale.
42. Kreskeit ar peoc'h mesk ann dud, rak breur ha c'hoar omp oll :
D'hon farkou goulet ive d'ar mare gliz ha heol.
43. Ha pa vo pred ar maro, 'n'hon diveza huanad,
Deut, ar Werc'hez sakr ha c'houi, zerret hon daoulagad !

CL. GUITTEREL, *Belek.*

P. S. — Zantez Germana, digaset da Bluguerneve gand ann
otrou Riguier, person ar barrouz, er bloa 1870, a ve gret he
fardon eno ar c'henta zul a viz here, deiz gouel ann Itron-
Varia ROZER.

IMPRIMATUR

Saint-Brieuc, le 16 Février 1875.

A. CHATTON, *Vic. Gén.*